

四庫全書

集部

欽定四庫全書

集部

古廉文集卷十

詳校官編修臣程槐

中書臣劉源溥覆勘

總校官降調編修臣倉聖脉

校對官編修臣沈清藻

謄錄監生臣王岑

欽定四庫全書

古廉文集卷十

明 李時勉 撰

碑銘

故禮部右侍郎吾公神道碑

正統六年秋八月二十一日禮部右侍郎吾公以官終
於南京訃聞天子遣官賜祭命有司治墳塋歸其柩葬
於衢之開化鐘山之原明年公從子珊走京師泣告於

予曰先從父既葬而神道之碑未刻敢以是為請予辱
與公同年不可固辭謹按狀而序次之太宗文皇帝以
神聖大德入正大統二年甲申廷策進士四百七十人
選其簡秀而有文者二十八人績學詞林以待擢用公
在列而年最少質偉才敏博覽羣籍作為文詞其言滔
滔然無凝滯方是時四方多獻祥瑞二十八人者輒進
詩賦以歌頌聖德一時文學之盛人皆欣羨五年冬拔
其中五人為脩撰九年以公與楊相段民沈升等六人

為刑部主事時有言理刑得臯陶方稱者上聞之曰此
儒者之言當擇其人故以六人主事且命所訊囚既定
罪徑自引奏備陳其情犯問擬不當則坐罪六人者恐
懼祇謹以求副上意讞議務適其中敷奏必以實舉無
差失他刑官老於法律者咸推讓其能而公尤以寬平
得名陞郎中總一司之政益謹其職拜禮部侍郎上謂
尚書呂震曰吾紳出自翰林佐卿典禮可稱矣既而出
為廣東右參政宣德四年復入為禮部改南京刑部奉

勅考覈兩廣方面官有參政素貪黷結權要為援見公來以故僚友可恃公黜之又以殘刻被黜者三人時論稱其至公今上皇帝嗣大厯服以公舊人賜誥命褒之有言南京獄訟蕃滋掌刑部者過於寬縱吏得並緣為姦於是命公復為禮部至是以疾終公初拜侍郎衆往賀衣冠畢集而一室蕭然在坐有笑者曰家不祝先會賓乎譏其無所治具也公三佐宗伯一佐司寇持已以正不阿諂不瑣細嚴刻任性率直於人長短一無所較

出佐廣藩為僚長所擠亦畧無愠色其視名位得失是非榮辱坦然無介意會賓客故舊劇飲盡醉或脫帽撫掌歌詩以為娛或縱意談笑以戲謔為樂若甚放曠而其中亦有止節平生所作文詞甚富嘗和唐音集為一帙其好吟類此卒年五十有九娶徐氏封淑人子二人長聰次敏俱幼女四人二子側室史氏出公卒徐淑入自家來攜之以歸撫愛之甚至吾聞公開化名族之後曾祖諱隱操祖諱伯恭父諱仲廣俱贈通議大夫刑部

右侍郎祖妣妣俱贈淑人嗚呼公有文學操履遭際其
時位至顯要固不負先朝期待任之之意惜所施未究
而年止於斯耳然生有名譽沒有榮寵其始終復何憾
哉銘曰於赫太宗文武聖神圖惟至治敷求哲人臨軒
發策賜以高第憲憲吾公年富才偉游於詞垣超然出
羣揚芬吐竒厥聲有聞試以劇任俾典庶獄刑惟厥中
不僭不酷帝用嘉之以佐春卿以典祀事克殫厥誠繼
佐藩政再登朝端秩禮明刑惟敬惟寬明明天子舊人

是嘉錫以寵書恩命再加去繁就簡謂公尤宜厥施未
究而至於斯公性直亮素履坦平生有令譽沒而光榮
鍾山之陽玄宅所闕刻銘垂休耀於永世

正議大夫資治尹戶部右侍郎吳公墓碑

戶部侍郎吳公之妻淑人王氏遣家僮寧以監察御史
曹泰所為公狀來告曰妾夫不幸客死於外今奉其喪
歸葬欲具石表諸其墓道而未有文先生與夫交不薄
敢以為請如不恡賜之使夫名不泯於世則不勝大幸

先生幸無辭嗚呼公其死也耶公雖死吾嘗念公如未死者然公被謫去未嘗一日不冀公起而復用也及訃聞為之心驚膽裂而淚下不已者累日尚恐文其墓石也耶然以淑人之請之至又誼不得辭遂為之文曰公諱璽字信玉邵武人祖均用父仲政皆以公貴贈嘉議大夫戶部右侍郎祖妣妣皆贈淑人公性穎敏而端厚永樂戊子由郡庠生以春秋舉於鄉明年試禮部不第入太學自太學歷試擢武選主事以才能為尚書方公

所器重既以外艱去方公言之於太宗文皇帝奪其情
起治事未幾陞郎中宣宗皇帝知其賢陞行在戶部右
侍郎或云戶部政與兵部異公將寤於是職矣公至未
朞月而於四方萬國之版圖人民錢穀之多寡廩庾庫
藏之虛實莫不窮究考察皆得其要國家經費用度出
入盈縮莫不會計營度皆得其宜而於下之弊蠹一皆
昭燭無遺莫敢自肆者然後人始信公之賢且能為不
可及也正統己未從庫藏物入內帑勅太監洪公魏國

徐公與公董其事二公性不任煩劇惟總大綱纖悉一以付公公經理調度秩有條紀人不勞而事易集二公深重之壬戌秋外蕃來貢馬上問戶部馬入境日用芻束幾何邊郡所儲足給用否時公以疾在告同寅倉猝錯愕不知所對上以為大臣不事事下之獄辭連及公謫戍邊在邊僅二載以疾卒正統甲子二月二十日也享年五十有七公凡再娶前淑人黃氏後淑人王氏即請文者生男輒即天一女尚幼死時惟家僮與王淑人

在側遺命以其弟禮之子嗣公才能過人而謙卑不自
任初繫獄時或謂公可不上疏求理耶公曰本同事復
何言若言是欲見所長我不為也本部尚書缺公言侍
郎王公尚書才也號於衆宜薦之時雖無應者其後王
公果為尚書而公竟流落以死其天也耶其命也耶墓
在其鄉某山某原葬以某年某月某日而立墓石則某
年某月某日也

正議大夫戶部左侍郎姜公墓碑

公諱濤字伯淵姓姜氏太原州人曾祖原祖黼父唐卿皆不仕公性敏慧自幼輒知以讀書為事今兵部尚書靖遠伯王公副憲山西時行部至忻州選民間俊秀補郡庠弟子員在選中年纔十四就學為文日益以有進永樂甲子領鄉薦明年會試禮部不利卒業太學授同知嘉興府事嘉興政繁賦重公至佐政有餘力民安樂之未幾以舊官代還改河間府宣德壬子河間守以事罷去民數千詣闕舉郡守朝廷素聞公賢即日命知河間

府未幾以外艱去民老幼復詣闕懇乞留公上方慎擇
守令詔可之奪其情起復正統初京尹缺廷臣交薦拜
順天府尹戊午頒給誥命授通議大夫祖考皆贈官如
制祖妣妣妻王氏皆贈淑人癸丑進階正議大夫勲資
治尹甲子陞戶部左侍郎乙丑奉命督江淮漕運京畿
內外倉儲是歲夏得疾還京沒於長安里第四月二十
二日也上聞而悼惜之遣官致祭在廷公卿而下咸往
弔祭公生於洪武壬申享年五十有四配劉氏封淑人

子男三人寔寧定女四人寔將奉喪歸葬以禮部侍郎
侯公所述公行實來請予為墓碑文予聞公自嘉興代
還時奉命督工外有舊按察官在任之中恐懼前却若
無所容蓋嘗與公有宿憾者公詔語之曰汝勿怖宜趨
政事愈厚遇之河間民少恒產多以漁為生而或經豪
右侵奪陂池民不得其利公至今曰凡池湖魚蝦蓮葦
任民採取敢有占據者就執以來由是資民得遂其生
有王同知者以徇私與公不協及公赴京忽令吏守其

家不得出入讒毀百端未幾王死妻子生事械京師當
遞還送至府各惶懼賄吏勿令公知吏不敢隱白公即
召入款延累日資遣之母子謝曰公可謂以德報怨者
也京師祀事課賣皆出於民吏傍緣為民姦被其毒公上請
出天財庫以供其費凡三知貢舉一處之以公請託不
行沒之日家無餘錢幾不能具棺斂嗚呼此可以觀其
為人矣予為書之茲碑使欲知公者於此可考焉

贈戶部尚書王公墓誌銘

戶部尚書海豐王公以內艱將歸遣其屬官主事崔恭來致其語曰不肖佐先人沒葬未有銘今不幸老母又見棄背吾歸奉老母之喪於先人之兆合窆焉願先生賜之銘以掩諸幽吾先世淮北人宋南渡徙居浙之臨安曾祖仕元漕運百戶居武清漕運之子蔭補樞密院副樞入國朝棄官歸占籍海豐實佐之祖先人父也先人穎敏好學嘗從遊於張潞公仲舉之門經史百家之書靡不通貫而尤邃於易洪武壬子膺明經薦典教濱

州未幾懇辭歸養性至孝而仁恕副樞翁既老邁疾熱極思冰飲時暑月不可得遣人遠致之比至已告絕矣遂痛恨誓終身不飲冰有盜劫其財貨殖逾千金其後盜事覺被獲東光東光召先人歸其財僅半之縣官問如數否曰如數悉以散給里之貧乏及死而不能具棺斂者宣德辛亥二月五日沒年八十葬邑城之外西南先塋之次先母里人也孝敬慈仁本乎天性曾祖某祖某父士文蘇州守三世皆有賢德後先人十有五年年

九十沒實正統乙丑三月十九日也先人以不肖得推
恩始封文林郎吏科給事中進封嘉議大夫戶部右侍
郎贈資善大夫戶部尚書先母自孺人加封淑人贈夫
人子男二人長即不肖佐也次佑女二人長適莒州知
州胡璉次適杜瑛孫男十五人女十一人曾孫男女十
有九人先人老母之始終大畧如此先生其以是銘予
與公交久而善誼不得辭而公廉慎寬厚為大臣有名
能顯揚其親疊膺褒嘉之命而二親又皆以壽終是故可

銘也漕運諱拳副樞諱均讓大夫諱朴字子素夫人姓
靳氏葬以正統十年某月日也銘曰生同堂死同藏先
塋之傍誰敢壞傷

順天府丞朱公墓誌銘

正統乙丑六月九日吾友華亭朱公年七十二以沒嗣
子奎奉翰林修撰姑蘇張士謙所為公事行來請銘公
與子同年生月日後於子公魁梧奇偉雖老議論慷慨
意氣超然而予老病侵尋言語行步不逮公遠甚嘗與

公言我必先公沒其以後事相屬公笑曰未必然而傍人聞者皆以予言為然嗚呼安知公之死乃先於我也耶公今亡矣不可以復見矣慨想疇昔慟不可忍尚忍為公銘耶雖然公交之久相知之深則銘非予為而誰宜為乃叙而銘之曰公諱寅字孔暘別號雪庭曾祖某祖某父孟仁以公生而穎異讀書有文學尤通六書有晉唐人風永樂中膺薦至京奉詔入翰林得縱觀秘閣所藏古名賢法帖而其學益進與雲間沈先生民則等

八人者同擢為中書舍人太宗皇帝巡幸北京公預侍
從營建宮殿禁扁皆公所書永樂辛丑正旦上御奉天
殿受朝賀明日詔吏部陞公翰林編脩賜賚優渥仁宗
皇帝素知公名即任之初見賜金繡衣一襲慰勞深至
宣宗皇帝留心文翰日侍內庭累承衣服白金之賜時
游內苑命乘騎以從賜燕於萬歲山應制賦詩輒先就
今上皇帝緝熙聖學屢應召書大字賚予甚厚陞通
政司參議三殿重建復書禁扁賜綵段楮幣陞順天府

府丞今年春二月得歸省先塋到鄉未三月而竟以疾沒於鄉人某家公無田於其鄉無居第於其府無叔伯兄弟之親以相助徒以先塋久欲歸洒掃以盡追遠之忱而奄至大故嗚呼其可不悲耶配其氏封孺人側室謝氏子男一人即奎也女一人尚幼公孝弟有行義母患病百藥不效晨起焚香祝天刲股間忽有一人授良方服之即愈兄孔昭以誑誤當逮挺身代行後事卒得白鄉人馮章母死不能具棺斂公買棺買衣衾助之有某遂

者得福建典史貧不能行周以冠服資遣之人有冤抑
不得直於法司者公為言之必直而後已其人來謝拒
之曰汝去我非獨為汝也公性雖抗直而意度瀟灑家
有小樓客至必延坐其中觴詠終日極歡而罷能別識
古今名畫又善作山水幽趣枯木竹石尤極其妙好吟
咏所著有雪庭集藏於家墓在塘橋金山之原先塋之
次銘曰天賦才賢固將有為既底於用用無不宜四十
餘年不竟其施公望巍巍而止於斯九峯五湖山水清

輝蒼松白雪悠然以歸塘橋金山神游在茲後者不知
觀我銘詩

國子監丞永嘉李君墓誌銘

正統十一年丙寅春三月清明國子監丞李君上陵陪
祀早行踏空失跌傷其左足輿歸至家君舊有消渴疾
醫者悞用藥動其舊七日而死是月九日也死之日予
與司業趙先生以下往弔哭之慟比小斂大斂凡三往
哭之不知其淚之雨下也未死之前四月其弟裡與其

子鐸奉其母命來省之母孺人年已八十餘矣予嘗慮其以母憂去而不虞其死也今孺人無恙而君先死其誰以不悲予以非才領教國子恒苦事不治賴君得少事一旦遽失之是予失右臂也予之悲又安能以不慟耶裡將扶柩歸葬來求予銘君墓耶雖然君在以予為知己每盡心所事予亦委以心腹於其死也銘非知己其誰宜為乃不辭叙而銘之曰君諱廣字叔宏別號魯庵溫之永嘉人曾祖銘祖寧父彥辰皆不仕母杜氏君

初以鄉貢進士掌教汀之連城以外艱去服闋還朝擢國子博士應薦遷監丞至是卒年五十一君凡三娶初娶方氏繼康氏葉氏子男六人欽方出也鐸銳側室黃氏出也女二人其二出適陳容吳道演其婿也餘在室葬邑之吹臺鄉瀘灣之原祖塋之次與康孺人同兆焉嗚呼君其死也耶予念君猶未死也予聞君在連城時邑宰為民所誣御史鞠之罪當黜君力言於御史曰邑宰賢明不宜黜歷道其所以然御史果廉得其情誣者

竟抵其罪其正言感人有如此者歲旱民饑吏無所措
君曰學糧尚多可以賑濟古之循吏有開倉賑饑不待
報者公何懼而不為令從之民終以不流冗其仁心愛
人有如此者許氏子聰俊邑令逼為掾君曰此非掾才
也勸令以補弟子員其後果以禮經魁鄉薦由是連城
士子始向於學其善教及人有如此者前太守何公為
秋官侍郎欲薦君為令堅辭不就其恬退之節有如此
者為博士諸生有以束脩來見者受之及為監丞輒戒

門以絕諸生莫敢以私謁見貧乏艱饑者必思所以賙之其取與以義有如此者在官有不足嘗取給於其家其母亦嘗絡繹寄遺以副其意曰但守官慎無慮不給君亦感其母之言業業自持不敢妄有所為分外事嗚呼孺人可謂賢母君可謂賢子也矣是故可銘也銘曰有德有才有守有為不竟其施而止於斯吹臺之鄉瀟灣之原墓石有銘永世不刊

禮部郎中陳會鼎墓誌銘

會鼎故人贈禮部主事陳君迪簡子也迪簡慷慨有志
操予為進士十年而迪簡沒迪簡沒後十年而會鼎為
進士二十年而亦沒嗚呼方會鼎為進士貴顯時不能
無所感焉迪簡與予垂髫交於鄉而會鼎與予並肩立
於朝會鼎富於春秋而予迫於暮景子之有望於會鼎
雖不言會鼎當自知之非惟會鼎知之鄉邦故舊蓋莫
不信其然嗚呼又安知會鼎竟先我而沒也耶會鼎沒
後三年其子進來京師奉監察御史萬資中所為會鼎

行實請子銘嗚呼迪簡子銘之今又為會鼎銘其不尤可感也耶雖然進子子婚也為子婚而求其父銘安得辭既不得辭則叙而銘之曰會鼎諱鉉會鼎其字也以字行姓陳氏陳氏之先自江州徙袁之石分若干世至某贅常豐溪某氏其後子孫因居常豐曾祖惠存祖環中皆不仕考即迪簡母彭氏封太安人教育之遣從師習舉子業躬紡績給其費能自力於學學遂以有成永樂庚子領鄉薦甲辰登進士第奉詔績學於家戊申召

至行在擢禮部主事明年往河南督取軍匠立限期利害無一人敢後者繼往南京封諸番貨以能為內臣所重陝右廣西二處官軍征討有功賫金帛往賚之至甘肅數日所司寂然時兵部尚書柴公為侍郎參贊軍務君問何遲滯如此公曰軍數功次不清切會鼎召吏取文書閱之曰此半胸事耳為之定規畫指授方法不終日而數以成無分毫差失自大將以下皆敬羨歎服各設燕致禮幣以贈悉卻不受至廣西守將山公請歷各營

給賞之辭不往公曰他使至者皆求欲往吾不欲其往
聞朝使公忠正大故煩一往使夷人知朝廷有正人君
子亦馭夷之一益也會鼎曰吾奉命賫賞至此以付公
公宜自處之無預使者事若往是圖利也為制在朝廷
公遂不敢強及還公贈綺幣一端君辭公曰前此禮送
使皆出三司吾無與焉朝使來深慊鄙懷古人有傾蓋
若故者今豈異耶此非贈使者贈故人也豈宜辭君遂
受之及還又出郊餞偏裨皆曰我公未嘗待使如此厚

也亦嘗對人言吾受人物惟此耳正統戊午秩滿遷禮部郎中分政南京時五羊陳公為侍郎與論事無不當其意深加器重庚申太安人沒守制於家服闋將還朝偶得疾竟至不起癸亥正月九日也享年四十有八娶劉氏子男四人長進次輔次復次良側室李氏出也女三人其二已出適一高幼其年十二月十有六日葬廬陵某山之原先塋之次銘曰

英賢出世苦不多不多不久其奈何胸懷磊落星宿羅

才文浩蕩輸江河少年盡喜登甲科貴躋郎署無奔波
處闕平不頗麒麟飽食玉山禾官閒公府從逶迤

四十八年如擲梭忽然遺世歸山阿青山綠水煙景和
神此中藏安且那萬百千歲誰敢呵後有來者此經過
興懷慷慨淚滂沱桑田為海山為河清名垂世永不磨

大僕寺少卿沈公墓誌銘

公諱升字志行杭之海寧人永樂甲申進士於時太宗
文皇帝初即位欲作新士習命選進士之有學識者入

翰林改庶吉士讀書秘府所以期待之意甚厚得二十
八人而公預焉壬辰秋上特以刑部刑罰不清殿召公等
十有二人皆授刑部主事甲午冬命修五經四書性理
大全書成受厚賚丙午以失朝改行人未幾復其職丁
酉陞員外郎授奉訓大夫戊戌拜四川布政司參議以
外艱去服闋還朝改河南參議奉命往蘇州等處參總
兵官都督陳敬軍事乙卯春召還拜北京行在大僕寺
少卿授中順大夫己未賜誥命進階中憲大夫勲贊治

尹在職十有二年年七十一正統十有一年丙寅二月十八日以疾卒父明遠贈太僕寺少卿母葛氏繼母錢氏妻胡氏皆贈恭人繼室張氏倪氏解氏子男一人曰昶張出也女四人二出適二在室公沒時唯解氏與幼女在側族弟寧為府學教授亟召曰汝為我狀請國子祭酒銘我墓我瞑目矣遂卒是秋昶自家來迎公喪歸葬昶予銘永樂初公率衆言巡行事方朝會讀奏於廷百官聞之駭然驚異以為此大事豈易言之而大宗皇

帝獨喜命廷臣即議行之在刑部持身慎行守正不阿
居方面得大臣體採木植山中有調度人用不勞在蘇
州時有鎮守內臣恣意暴橫虐人人以不堪然皆畏其
勢莫敢發公上章屢劾之不報遂極言其所為僭妄不
法事具有據且曰今不預制之恐後將有不勝之患辭
甚懇切宣廟竟召之還其害遂已矣民皆歡抃稱頌凡
此皆人所難能者予意其必大有為也而忽焉以死惜
哉銘曰

金史八十一
卷十
大木十圍其蔭百里河流湯湯到海而止不極於海不
蔭其陰言念君子邈其德音茫茫海昌青山流水我銘
公墓莫之敢毀

吉安府學司訓李先生墓誌銘

正統己未有李氏子曰淳奉吾友前秋官主事劉君子
欽所為其尊府之狀來請曰先人沒廿有三年而墓未
有銘不肖已具石願先生賜之文刻而追納之墓中以
慰先靈地下幸無辭辭不獲則序而銘之曰先生諱嶽

字伯高其先居吉之吉水後徙郡城今為廬陵人曾祖
良叔祖華道皆有隱德伯父庭蘭仕元太醫院判父庭
賓天臨教授三子先生其季也性穎敏而好學十五六
時工為詞章鄉先輩皆竒之既長益肆力於經術文翰
俱美與兄伯遠伯遠齊名時稱李氏三鳳居家有孝弟
之行處鄉黨以德義見重有忿爭不平者不之官府相
率質平於其門教授邑里子弟多所造就嘗卜別墅於
郡城之北螺岡種竹萬竿藝菊盈圃書陶靖節詩於四

壁興至則舉觴詠歌悠然以樂士大夫稱為陶軒先生
而不名永樂丙申郡學官缺太守強起之上京師遂拜
司訓之命到官益嚴教條士子爭嚮於學明年賓興廣
西藩府禮聘為考試官以有子喪卒不果行未幾以疾
沒丁酉八月九日也享年五十有五先生凡再娶皆周
氏子男五人長曰昌誠先卒次昌誼即請銘者次昌信
昌謨昌訓女一人以是月十一日附葬五峯菴母孺人
瑩次先生有學術有節操足以為世楷式而今不可見

矣後生小子無所取法觀於此烏得不為之起慕也耶
銘曰

人誰無學而或無行誰無兄弟而或不競嗚呼伯高有
賢弟昆有學有行無媿古人惟古之人何必多壽銘以
昭德永垂不朽

陝西行太僕寺丞郭君道昌墓誌銘

陝西行太僕寺丞郭君道昌沒其子瑞至京師以其父
喪南還而徵銘於予因念昔與前國子上舍彭紹魯同

遊學道昌所居鄉多大家道昌耿介少還往所與相還
往者獨紹魯耳故予因紹魯而識道昌此鄉故蓋舊且
久也道昌之所以得入郡庠為弟子員亦紹魯之力也
道昌既入郡庠篤志於學貢於成均永樂癸卯授大理
評事以寬平得最績致褒嘉之命以及其親任滿遷擢
北京太僕寺丞道昌性剛而直衣服飲食好精潔待賓
客必豐厚行事任已志不受人言亦無所阿比於人以
是得名然亦以是忤於物遂有陝西之命在陝西持身

守官處事接物與在京師時斬然而異故聲譽大起韓
王聞其賢甚敬重之正統癸亥春來報政天官以疾沒
於靜海正月二十有六日也享年六十三父貴宗以道
昌貴贈大理寺右評事母贈孺人子男三人璉瑞理女
四人以某年某月某日葬某山之原嗚呼永樂初予哭
紹魯於南京三十餘年而又哭道昌於北京人生幾何
出處死生乖離之感至於如此豈不可悲也歟予前年
暫還故鄉訪紹魯之故居荒烟野草欲求其彷彿不可

復得道昌歸靈爽不昧追念疇昔抑又可悲也矣予為之銘非以道予之悲亦以洩道昌之悲也銘曰

嗚呼道昌其死也耶仕宦數千里外報政天官而死於此也耶天賦聰敏之資磊落之才終以一太僕丞而止也耶嗚呼道昌其不可悲也耶雖然世有負其才技而不沾一命者矣有始雖榮顯而終以不令者矣道昌歷官二十餘年得正而斃亦可謂榮幸也矣嗚呼道昌楚山峩峩楚水泱泱誰卜爾兆我銘爾藏福爾後人以延

厥慶

錦衣衛指揮使王公墓誌銘

公諱節字尚節其先山東濟南之鄒平人曾祖某父成
洪武初從軍隸燕山右護衛既老疾公代其役太宗皇
帝舉兵靖難累功陞旗手正千戶調錦衣衛永樂甲午
從征沙漠以功陞指揮僉事賜以銀兩綵幣仁宗皇帝
特陞指揮使欽給誥命子孫世襲以正統元年十月二
十八日以疾沒將以某年某月日葬於順天府大興縣

某村之原公有子二人長曰某次曰某皆幼女一人適彭城衛吳亮其同寅指揮僉事孫景亨自幼與公善書其平生來請銘公容貌溫和處心忠厚寡言笑薄滋味衣服朴素不尚華靡雖貴顯泊然以居門庭寂如家雖貧窘見親戚故舊有凶喪患禍不給者竭力以濟之為千戶時嘗署鎮撫司推鞠獄囚務究其情不任已意歷事四朝小心慎密仁宗宣宗知其廉勤端恪待遇之甚厚公退慊然自處不為驕貴之態與人交歡然無所忤

而不可干以私沒之日寂無餘資遺戒薄葬毋作佛事
是皆可銘也銘曰

惟德之茂以有厥後惟吉之藏永世其昌

巴陵程大尹墓誌銘

公諱式字邦憲姓程氏世家饒之浮梁沈毅簡重聰敏
過人自幼已歧嶷不羣一日與其弟行遇邑宰宰見其
俊爽叱曰誰家兒敢嬉遊通衢且命從者執以來公聞
輒奔走執其弟詣宰公回顧知之即還詣宰曰此吾弟

也懼明府驚悸喪其心故還初意明府有以進教之也
乃非禮陵之使恐懼不知所為豈為民父母之心哉宰
顧左右笑曰吾姑試之耳兒果可教遂禮送去邑庠補
弟子員公既感宰之知己也一志於學學遂以有成洪
武丙子領江西鄉薦入胄監整軍河南有聲竣事還待
選天官尚書張公統見其瓌偉進之與言而喜公初名
超字德超特為改今名與字云授湖廣岳之巴陵令振
頽俗草弊蠹多所紛更上下初不甚喜久而人便之事

集化行先是軍衛縱暴縣不敢與抗及公至皆戒斂跡
民有健訟者恃故態誣里胥里胥將誣服公拘其親
屬置別令各具贓物色輕重果互為異遂辯其誣洪武
末數上書言事不報乃懇求教職會藩郡交薦不得請
調澧之石門石門俗朴野行數十里不聞絃誦聲公至
為之興學校之教厚生徒之餼蠲士人之徭行鄉飲之
禮由是民漸知學而俗日以美其所施務安靜人或詰
其異於巴陵曰為政何常取其宜於民而已豈有異哉

未幾終以前請教職故左遷欽州吏目州有羣盜殺人
沉屍於江以滅跡獄久不具衆議釋之公曰不可獄宜
寬乃間行得其實盜乃服辜島夷叛藩臬檄他官往招
者數輩多覆實復命公往猝與夷遇矢石交下公直前
大呼曰吾欽州程某也來與汝衆請命朝廷安生業耳
乃羅拜公諭以禍福卒使歸歛聽約束而還由是二司
與州郡以賢良交薦丁內艱不赴內弟典庫藏虧貨公
坐累謫順天之楊村驛凡六載始歸邑宰復以明經舉

至京師以疾卒永樂甲午二月二十日也享年五十明年某月某日葬邑西勾瀾灘畔將以宣德某年月日改葬邑之某鄉某里某山之原曾祖某祖某父聞信俱不仕公凡再娶朱氏唐氏子男五人長鑽次鋌錯鑰釗女三人孫男七人女三人公子學該博雖老手不釋卷陰陽律厯星命卜筮釋道方伎之書莫不涉獵其為文簡淨詩尤清婉性至孝母孺人嘗遭疾醫藥弗效每夕潔齋露身禱於神明乞以身代母病果瘥聞信公沒陰陽家

謂不利三年後乃可葬公曰士三月而葬寧顧利不利
卒葬之治喪不用浮屠一遵文公家禮訓教諸子必由
禮義無詐妄之習故錯以明經第進士為茶陵令得名
於時公之教也錯以事至京師奉其從弟道興所為狀
來請銘銘曰

有德有才可與有為絃歌小邑不究其施其施不究而
又不壽天道可徵仁者有後卜吉改葬以妥靈神靈神
既妥其佑我後人

鄉貢進士蕭不敏墓誌銘

不敏諱愚姓蕭氏不敏其字也其先世居湖廣曰文昌者避馬楚之亂徙居廬陵之曲山六傳至耕道宋開禧進士廣之仁化令曾祖以萬舉博學宏辭一不偶輒絕意仕進獨好淵明詩有和陶集祖復心父樂存皆不仕樂存嘗從進士王子讓學詩經以詩經教授於鄉二子不敏其長也資性淳重穎敏年十三已能屬文辭為時輩所稱道既長博覽強記日數千言聖經賢傳諸子百家

之書多所涉獵而尤邃於詩蓋其家學也尊府欲遣遊
邑庠不敏跽曰不肖侍大人幸居長逸身於學家政之
勞其誰任之尊府不之強命次子時中入為弟子員永
樂辛卯時中擢進士第一人入翰林為脩撰而尊府沒
不敏哀毀骨立葬祭以禮時中歸守制兄弟自相師友
事其母以孝聞歲甲午不敏舉於鄉明年上禮部至期
太宗文皇帝命時中為考試官時中欲以嫌辭不敏力
止之曰朝廷取天下士以備於用豈可以我一人避嫌

而廢公義也且我之來迫於有司之命老母在堂獲歸
承菽水之歡幸矣竟投狀禮部去士論偉之既歸從學
於門者曰益衆每秋闈榜出人輒指數曰某與某皆蕭
先生門人也嘗痛其尊府早逝時節忌日薦奠必哀對
食偶豐必泣然流涕曰安得以奉吾父母也時中沒教
育其孤無異所生平生未嘗與人爭論是非有遇以非
禮不與較輒為自咎而已其人聞自悔服癸丑秋九月
遭母喪水漿不入口者六日幾絕而復甦由是得疾明

年四月二十一日沒得年五十有四配周氏有淑德子
三人長維禎宣德庚戌進士次經次綸女三人孫男一
人孝孫女二人維禎第進士奉命績學於家所以教之
立身持已為政治人之方委曲切至維禎既承召還朝
將有職任之榮以致祿養而不敏竟沒豈非其命也耶
維禎將歸以某年月日葬不敏於某山某原奉太官署
正萬節所為狀來請銘古者四十始仕孔子曰學而優
則仕今之仕與學庚未至而汲汲焉求進之不暇苟得

之則侈然自足如不得焉不復計其已之短長而惟怨
尤於人者比比是也然則學足以高於人言行足以信
於人鄉黨推之有司薦之退然自守窮約至於老死而
無悔若不敏者可不謂君子歟是故可銘也其平昔所
為詩文若干卷詩傳集講若干卷藏於家銘曰

其學之充兮不獨以成乎已而又以成乎人其積之厚
兮不惟以裕諸已而又以裕其後昆惟仁是尚兮惟義
是遵惟天爵之尊兮足以潤身果孰為貴兮孰為賤貧

鳴呼不敏雖死猶存

謝同知墓誌銘

廬州府同知謝公考績至京未十日而卒卒時其嗣子禧在側既殯殮將奉柩以歸葬持翰林侍講邢寬所述公治行來請銘按狀公諱庸字孟常四川重慶之忠州人曾祖某祖文才元某路通判父必先母某氏性穎敏有學識永樂丙戌舉進士不第入為太學生癸巳授河南道監察御史庚子山東妖婦聚眾為盜三司不能制

既置諸法詔簡廷臣之才賢者往任方面公膺薦為按察副使命殄餘寇公以計獲驍賊劉信者械送京師尸諸市餘黨散落悉就擒永樂丁未報政入朝奏對不稱旨遂有廬州之命到官以興學校督民耕桑為務寬厚之惠屢施於上暴虐不及於民民甚安之宣德十年七月五日以疾卒於北京之寓館享年五十有四娶韓氏子男三人長禧次裡次祺孫男二人女三人某年某月日葬於鄉之某山某原公剛介廉慎才器過人為御史

守法持正不避權要禮部尚書呂震寵遇方隆人不敢近
公糾其不法數事中官有恃寵靴履上殿者公劾其不
敬上欲宥之公執不可左右皆失色太宗曰御史言是
也在山東上言官軍捕盜逮及無辜願罷捕兵以安其
人詔從之廬州所得俸資以新學舍飾神祠購書籍以獎
勵學者而所居蕭然歲歉輒出巡省發倉廩貸民粟貯之
寺觀祠廟計口給之民以無饑及公上京師民數千人
訴於巡撫官乞遷公郡守以終厥惠奏至未幾而公竟

卒嗚呼豈其命也耶抑其民之不幸也耶銘曰
謂仁者壽何不耄期謂命有德何不隆資人望攸歸而
止於斯有以張之庶其在茲

晚圃處士墓誌銘

闕

有處士晚圃翁沒已三十有六年矣其孫暘谷司
訓璉秩滿來天官始撰次處士行實請銘於予曰先大
父沒之明年璉父以閭右徙實京師不肖亦隨徙補郡
學弟子員忝領鄉薦得外校官故於先大父之潛德有

未暇及恒切痛心謹述其大略乞銘於先生使先德不
泯以垂無窮佩惠其敢忘子感其言遂序而銘之曰處
士之先本曹姓武惠王之後自南渡徙家廬陵其曾大
父曰士昌者娶梁氏梁氏無子子孫遂冒梁姓大父壽
可考以清皆隱弗仕以清客遊廣西因亂離留不歸及
京朝平定海內處士跋涉險阻往迎之以清見處士至
喜甚即日治裝行未上道以疾沒處士以不能遂其意
哀毀幾絕或慰解之曰父子相見而後至此亦足矣使未

見而先沒奈何且死生有定命公不聞惟送死足以當
大事乎况在萬里外可不自慎以全孝道耶處士悟遂
杖而起殯殮訖扶櫬歸葬以幼子尚留廣西復往挈以
歸一門之內數百指相與歡然無間言平生不事華侈
教子弟以孝弟敦厚為務待人一於誠信言語雖抗直
而心氣和平常夜有盜入其室覺而執之家人欲置之
死處士戒諭之曰汝所為殺身之事吾釋汝自今宜改
悔盜感謝而去不復為盜處家勤儉自足雖老不少自

暇逸尤好治圃種菊數百株花時邀賓客賞玩酣飲淋漓輒誦韓魏公莫嫌老圃秋容淡猶有黃花晚節香之句因以晚圃自號云永樂戊子正旦晨起家人行禮畢曰吾身飄飄然其歸矣乎舉家驚怖求醫藥悉拒絕之至夕奄然而逝享年七十有餘處士諱榮字志英娶王氏有淑德先處士卒子男二人長庭桂次庭椿女三人皆嫁為士人妻孫男六人長即璉次鏞鐸鉉鉞曾孫男十一人墓在里石曰之原銘曰

塘東有曹今幾世實曹武惠王後裔從來南渡徙居此
傳至於開有三子伯驥仲南武其季並以明經同擢桂
厥後士昌室梁氏冒梁之姓為梁嗣子壽可隱德不仕
至於以清生處士賦性聰明貌豐偉處心接物甚和易
恬淡無求亦無忤居家孝親訓子弟一以誠敬與仁義
取適園田樂樹藝逢迎賓客遺世事享壽考七十有四
正月元旦奄然逝坤元之山艮之水下錮九泉靈所止
刻銘斯藏告萬祀

素軒毛先生墓誌銘

君諱靖字安行姓毛氏常州武進人本業儒從遊今禮部尚書胡公之門受易經後以家學郡大夫辟為其府陰陽正術其為人恬澹不務華侈儀容端整言論謹恪事父母極孝愛母沒奉繼母陳氏如所生撫二弟友誼甚篤待宗族恩意周備族子姪有幼孤者收養教誨之與已出無以異比長為婚配築室以居之鄉人窮乏不給者周之惟恐其有餓殍後部使者聞其賢嘗屬以監

獄事有二人爭訟繫獄一富一貧貧者病富者以白金五十兩賂君令勿容醫入視疾且阻隔其飲食欲置之死君厲聲叱之曰爾獨不畏官法且置此人死無難其如人心天理何輒令醫與之藥且召語其家人時具飲食貧卒賴以全活晚年益好閒靜築一室無雕鏤繪飾環植花卉日吟詠其中號曰素軒一時皆以素軒先生稱之正統八年癸亥六月十有四日以疾卒於官享年六十有一配葉氏子二人長玉辛酉鄉貢進士績學成

均次尚幼女五人君卒時仲弟端方為安吉令玉在大
學惟季弟宏經理其喪玉聞訃將歸襄事奉國子司業
趙公所為君狀來請銘君之先世居真定之元氏五代
時有諱某者以儒起家仕後唐河南刺史歷晉漢周以
至於宋代有聞人中更亂離譜牒亡失漫不可考高祖
某元將作院使曾祖某常州路推官子孫留家武進遂
為武進人祖某國朝邵武同知同知三子長某山東道
監察御史次某稽勳郎中季某號蘭竹先生君之考也

蘭竹幼警敏同知君嘗曰是兒慧過人第恐非壽者相
術者云有疾可延後果目疾失明嘗曰吾目雖不明吾
心未嘗不明乃專意數學以人生年月日時推其貧富
貴賤壽夭無不中尤精於潛虛有問者斷其吉凶悔吝
禍福不失毫髮由是名益彰聞永樂中有薦之於朝者
太宗文皇帝召至京師屢試之無不驗甚寵待之顧謂
近臣曰此袁天綱也因問卿幾子有能讀書繼其業者
否答曰臣有子為陰陽學官頗知書但迫於有司差委無

暇於學帝即勅有司無差君以他事君既蒙恩詣闕謝
召見便殿與語謂之曰此子非無用才待君百歲後有
以用之未幾蘭竹以老疾辭歸而文皇亦上賓由是君
竟沉鬱下僚無復有能薦之者卒不得顯聞以死豈非
其命也耶墓在鄉某山某原其葬以某年月日銘曰
荆璞之琢不為瑚璉其美未施其遺則遠彼貴而壽名
有不聞沈鬱下僚而道則尊膺膺高原松柏之茂既固
而封克昌厥後

劉處士原舉墓誌銘

原舉沒之十五年為正統元年其子德在北京來謂予
曰先人葬未有銘不肖欲得先生銘歸而勒諸石追納
之墓中以慰先靈地下為不朽圖先生與先人交厚必
不恡銘之予姑許之明年夏德將還以署正萬節之狀
來趣予銘乃叙而銘之曰原舉姓劉氏諱凱原舉其字
也劉氏為邑著姓其先自漢長沙定王發分封次子禮
於安成因家焉有曰德言者南唐時率子弟保障鄉里

後以其兵歸宋仕至水部運使南昌郡男子孫皆官父
蔭六世至溥以五舉魁天下由溥之孫曰安世清純兄
弟父子祖孫聯登科第時宰表其門曰叢桂因號曰叢
桂劉氏竹西翁定字君大父也元進士宛平令仲炯隱
士叔璋伯父父也君繼其世德之美生而穎敏魁岸奇
偉美鬚髯善談論諳練世故識達人情鄉里有忿爭不
平求之於君君一言折之無不聽從官府有疑事不能決
者質之於君君為處置而行之鮮有仆敗嘗為賦役長以

已資輸逋二百餘石又為里役適造版籍鄉豪欲賂之
詭寄田糧堅卻之與鄉人張其姓者坐累被繫一日張
遘疾危劇衆皆懼不敢近君曰同處患難而不相恤非
義也扶持之不離側又為出資以求醫藥卒賴以安里
有誣搆仇家三人罪至死獄成矣君謂令曰是獄有冤
令曰前宰已達上司矣君不忍其無辜也資遣其家人
赴訴京師卒得白嗚呼君之才智如此苟有能薦之授
一職而致之官理則其惠之及人豈止此哉乃卒不能

得而浮沉里閭以死獨不可哀也耶君凡再娶皆彭氏
子男六人長裕次理早卒次憲雲次憲政次憲高次憲
偉鄉貢進士未第而卒孫男九人壬寅十一月三十日
以疾沒於家享年六十有三墓在其鄉禾場嶺之原銘
曰

安成之劉沛國裔始自長沙發子禮有曰德言南唐際
率子弟保障鄉里以兵歸宋宋所貴水部郎官轉運使
子程吉州服官理邑有劉氏始於此父子祖孫襲科第

立榜門閭曰叢桂至今鄉邦數門地曾祖才翁祖定字
父叔璋甫皆遜世處士之生繼其杜美髯長身復英偉
鄉稱孝弟與仁義仁者宜壽福無已云胡六十有三止
南離之山坎之水卜云其吉寔其趾踰百千祀莫之毀
安爾之藏祐爾嗣

周處士添祥墓誌銘

處士諱禎字添祥姓周氏靜樂其別號也周氏之先世
居吉水之泥田宋御史中丞訓始析居安成之城巾五

世至鑑遷於高村塘高村塘即今之橫磬也鑑生安國
安國生銓銓生容容生天瑞天瑞生獻可獻可生仁夫
處士曾大夫也仁夫生晉翁晉翁生良能處士大父父
也處士生而聰慧體頎而貌豐美髭髯聲音洪亮辭氣
溫和見者莫不敬愛之早失怙母駱氏教育之既長遭
家道中微卓然能自振拔樹立以不墜厥先緒事其母
極孝生事葬祭皆盡其禮無遺憾異母弟隆祥幼撫恤
友愛之意極至出贅外姓及沒歸其子鞠之如所生既

為婚配割產業築第宅經營園田以居之族曾孫思理
孤貧來相依撫育之成其家室撥田地與之而後命歸
其宗泥田初祖祠墓損壞雖老猶率子弟往拜掃修理
完備而後歸女兄以歸寧卒棺斂葬之外母遭亂寡居
迎養於家始終無怠意甲寅歲歉遠近閉糶獨發倉廩
賑貸鄉里賴以不饑嘗為賦稅長征斂以公不分內外
十餘年官無逋負人無怨咨一日翻然曰予老矣何為
久役於人遂懇訴於官得代輒削跡城市日與賓親遊

山水間以自適曰塵俗之事不關吾心則豈不樂哉因以靜樂自號預卜善地作壽藏凡棺槨殯斂之物皆具正統九年九月七日以疾卒享年七十有六娶王氏無子以族兄濟南府經歷寬居仲子孜穀為後娶彭氏生子勵穀早卒孫男三人長曰章次曰郁今為縣庠生次雍女五人曾孫男三人某年十月十九日葬順安鄉石魁山之原葬之後六年孜穀與郁奉中書舍人劉鉞之狀來請曰先人葬未有銘願先生賜之銘將追納之墓

以慰先靈地下不勝其大幸予曰予與尊府交知其為
人中書之言不誣也是宜銘銘曰

橫礮之周自泥田來居安成知幾年御史中丞訓始遷
五世至鑑徙高村歷世益遠族益蕃至處士生才且賢
美髯頎秀思飄然遭家中微歷險艱奮自樹立志益堅
家居孝友世相傳情孚宗族義亦敦胸襟瀟灑誰與肩
有子有孫有田園足以貽後光於前老來世事都不關
烟霞泉石縱遊盤達生知命樂其天超然而往不復還

卷十
一
青山白石銘以文千秋萬古長不刊

彭隱士同升墓誌銘

先兄恒心先生有友四人其一蒼山彭君同升先生餘
三人者相繼亡歿惟蒼山翁隱居不輕出入獨來執紼
送兄葬予因得一見時年已七十三矣而康強精健勝
少壯人予謂翁宜有壽予致仕歸必當得再相見以盡
下懷及今年予得告老將辭朝而翁沒於家竟不獲償
此志嗚呼慟哉既歸翁之子貫進唯自述翁行來請銘

嗚呼予方悲翁之不得見尚忍銘翁墓耶雖然翁與子
兄弟交自幼至老始終之誼不可辭遂叙而銘之曰翁
今為智溪彭氏翁之彭本出東街與智溪不同宗其尊
府復安與智溪伯樞同婚於里之劉氏伯樞無子欲擇
於同宗無可其意者見翁少穎異遂螟以為後兩宗之
先世多顯宦富盛代不乏人翁自幼讀書循道理居家
持門戶不肯為非義年十五六二親相繼傾逝子然奮
自樹立會官府有重役他皆亡避翁獨往役比畢事歸

而藩府符下凡避役者皆謫戍邊人以是服翁之識達
有妄人誣以奸黨人皆危之翁不以為意及至官反覆
明辨卒得白而歸既歸資產蕩然殫力竭慮辛勤以自
植始得復其舊而年已老矣家事以付諸子退隱於所
居之後蒼山之陽顏其楣曰蒼山隱者客至輒觴詠累
日而不厭或曰翁孝弟人也伯樞晚年妾生子理疾草
指理謂翁曰以子累汝翁泣曰不敢違命伯樞沒撫理
恩意備至既長延師教之為之婚娶後出商客死於外

謀歸其喪撫其遺孤子紀至成立析家業十之六以優恤之自出繼時其兄性善李清皆在後相繼淪沒俱無後翁嘆曰吾本宗可使不祀耶既命二子繼二兄之後別置田園築室於隱居之旁俾居之以承其祀與其從兄務威相與尤盡道所居離隔若干里歲時必相過談論款留累日極歡而後別始終無間言翁尤好施與常貯藥物於家有病者即與之宗族及里之貧不能葬者輒施以棺配孺人郭氏分宜人性端淑寡言笑務勤儉躬

紡績理中饋皆有成規其所以相成翁教子之意尤篤
生子男六人曰義遜德貫即求銘者以進士授刑部主
事拜浙江按察僉事皆郭出也曰智明側室李氏出也
女二人長適樂清知縣伍冕次適劉良孫男二十人女
九人蒼山翁六世祖國子上舍高祖某曾祖悅翁祖芳
遠父即復安此其世也銘曰

智溪之陽官山之傍惟山蒼蒼惟水泱泱昔也同堂今
也同藏神之安之厥後彌昌褒崇之榮九原之光惟昌

惟光惟德之宏後來不知視我銘章

長陵衛指揮僉事錢公墓誌銘

長陵衛指揮僉事錢公歿將葬其嗣子某因欽天監監正彭德清來請銘拜且泣曰先人在時嘗言先生於不肖自居長陵衛客有京師來者輒問先生安否故不肖雖未識而耳熟先生蓋有仰慕之心焉先人英偉慷慨有智畧嘗欲立功名當世而遭遇聖朝累聖相承四方無警無所施用費志以歿聞者傷之今葬有日願得先

生銘以葬先人有知將不悼其不幸而慰安地下以蔭
佑我後人則皆先生之賜也感佩其忘乎予既悼公之
歿又重其子之請銘其可辭按錢氏世居應天之六合
曾祖某父伯源好善樂施鄉里稱焉公諱某生而穎敏
少有大志年十二喪其父哀毀如成人事其母極孝愛
姻親父老見者莫不重之知其必將昌大其門或歎曰
伯源可謂有子也後以戚屬選為散騎舍人洪熙改元
陞錦衣衛指揮僉事宣德初調長陵衛持已謙慎蒞政

勤能愛惜士卒處事成得其宜無矯激躁妄之失暇則
遍游山水以自娛嘗曰吾得飽觀壽域龍鳳盤蔚之雄
亦足以自樂矣故沒之日人皆惜之而哀之者衆也娶
某氏子男二人長某次某女一人宛平縣香山梅廠之
原其葬處也宣德八年十一月廿七日其葬之期也銘
之曰

巍巍壽域山川攸萃職僉衛司實居要地靜觀龍虎保
制山陵與國同休坐閱太平梅廠之原卜協龜筮定者

為誰故錢散騎

劉逸士志達墓誌銘

逸士諱適字志達松坡其別號也姓劉氏晉安成太守
遐之後遐為安成太守子孫因留居城西之下村七世
至拱辰仕宋文州文學參軍罷官歸徙下村江北之樟
塘今所居是也高祖孚先南昌府學教授曾祖繼屬祖
存忠父子善皆隱不仕逸士生五歲而子善沒聰慧異
常兒既長好讀書學問常從復古謝先生遊於名山勝

境登臨唱和窮歲月忘返以是學日益進詩名日益以
有聞事其母極孝謹與二兄處友愛尤篤及家累既眾
兄弟欲分異其財產惟二兄所處一無所較長兄志楨
惟一子未周及病且死召逸士與語意欲謀所以繼嗣
者逸士曰兄有此子在弟雖不才不敢悖德志楨亦喜
曰如此則吾瞑目矣從子彥政永樂中坐累謫戍南丹
涉險阻冒瘴厲送之直抵配所經營宅舍俾安居而後
返族有貧窘不給婚喪無措者皆周濟之族兄惟章以

所藏李懷琳嵇康絕交書付逸士重捐白金酬之以其
貧也武士史仲和貧苦篤學好吟詩而樂幽寂棄闕閭
之居來居於鄉之介源介源多劉氏業逸士與諸兄言任
其耕鑿樵採又常資給之姻友謝君利亨深山中闢地立
屋以隱曰桃坪率子姓捐山下田二十畝與之其尚義輕
利類此中歲嗜樂閒安足跡不至城府顧所居傍近地
山水清秀寬廠幽雅鑿池築園圃種松栢桃杏其中構
二軒顏其楹間一曰小桃源一曰松坡清逸客至壺觴

尊俎歌詠吟嘯以相樂或時取懷琳饒介之巖子山危
素劉仲修端木孝思彭伯圻諸公所書與夫遜遊楊先
生謝司訓汝愚桃源令利貞諸交游往還手翰觀覽以
自適風晨月夕則取阮籍陶靖節詩反覆諷咏怡然自
得若與世不相關者正統丙寅正月二十九日以疾卒
享年六十娶武陵伍氏子男四人長曰恒坦恒直次曰
恒謙恒煥女二人長適上田李體相次適東郭王儀楷
孫男十三人明年丁卯正月九日葬本里坑口之原平

昔所著有松坡集山谷唱和集桂館金蘭集藏於家葬
後四年恒坦昆弟奉廣西憲副萬資中狀來請予銘銘

曰

嗚呼志達一鄉善士敦乎仁義篤於孝弟德週於身才
不用世泉石烟霞樂其有既謂宜多壽享福無已一日
不見莫不揮涕坑口之原文獻之里青山白雲滄江流
水嗚呼志達乃歸於此

貢士劉憲偉墓碣銘

俊字憲偉姓劉氏安成人曾祖定宇祖叔璋父原舉皆
隱居絕意榮進俊生而秀偉五六歲時已能屬對語驚
人十歲能為詩伯祖仲炯元進士為宛平令有詩經傳
義藏於家俊見之曰獨不可繼其志耶遂發憤以就於
學父大奇之遣入縣庠為弟子員俊既穎敏又加以勤
勵故其學益進莆田徐先生每夜起見俊所居舍燈火
達旦謂諸生曰知自學者吾劉俊也甚重之壬子秋果
以詩經領鄉薦乙卯冬始上春官自登舟手未嘗釋卷

至京主翰林編修吳節家見其勤苦甚謂曰得無勞乎
獨不知古人息焉之義乎曰知其益不知其勞也終不
輟卒以是得咳疾藥弗效以丙辰四月十一日沒年纔
三十有六衆以編修所為狀來曰俊學不得祿死又不
得銘無以慰其不幸於地下先生與其尊府交厚銘不
可辭予得狀不辭而銘之曰俊孝弟誠信人也父嘗患
疽久不愈晝夜侍不暫離躬自澣濯不以委家人癸丑
春當就禮部試值其母病輒留視疾或勸之曰時不可

失曰急於功名而不顧父母可以為人子乎同舍友將引其鄉人為津庠生者欲假俊名薦之俊不知私也而聽之一日分司官至怒學校慢之而無所發見新進生長大而粗鄙召至問所讀書茫然不解命題考之不能措一辭窮究舉主逮問俊或謂俊盍引同舍以自白乎俊曰吾豈不慮至此然不欲棄吾信也分司知其然亦薄其罰遂得還人以為難能也俊嘗見兩漢文章曰科舉之文足以發身成名不足以及乎古吾終當從事於

此由是觀之俊非有志之士乎哉與俊同時出者皆第
進士有名於今而俊獨不幸死矣得不可悲也耶俊沒
時其兄憲政在側問曰不意吾弟至此其有所言乎不
應強之再四曰吾讀書學問欲成先志以追蹤古人而
卒不遂夫復何言竟無一語及家事俊有子男三人女
三人皆幼憲政以公事留北京獨一家僮扶其櫬以歸
嗚呼得不又可悲也耶銘曰

故鄉之山昔也傷離曾幾何時忽焉以歸不增其輝而

增其悲白雲霏霏綠水灘灘我銘在茲千載之思

李給事中父墓誌銘

兵科給事中李頰及門告予曰先人沒幾十餘年既葬而墓石未有文不肖幸叨祿明時蒙被恩命追贈先人第七品今又得歸省老母於家焚黃以致命於先人之靈願先生賜之銘追埋之墓中謹以國子博士汪公所為先人行狀來予辭其請至再四卒不得辭按狀李氏之先居豐潤後徙臨清公字士賢資貌奇偉美鬚髯

敦厚慷慨不為庠鄙庸俗之態性至孝事其父母無違
禮處親族黨一於誠敬尤好賓客過者輒劇飲大醉而
後已人有爭辨是非者必為之別白無委曲脂韋故年
未五十共推為耆德相與言之官俾聽斷鄉里公亦莫
得而辭焉於是老長子弟咸相戒飭毋為不善以煩公
教縣大夫以此重之每歲鄉飲公與焉禮儀肅雍觀者
敬嘆平生未嘗為禮法外事見人有一善譽之不絕口
有不善萬方為掩匿使自悔勸世故多以長者稱之永

樂戊戌嬰疾卒於家得年六十四以是月日葬於邑東
南溫良社之原曾祖通甫祖吉卿父用俱隱德弗耀娶
張氏卒之後十一年為宣德三年始以子貴受勅贈公
兵科給事中配封太孺人子男六人頰顥灝穎頤顯孫
男二人嗚呼公居於鄉非有職任條教以號於人而人
信服之如此安享壽考終於正寢而有令子以仕於朝
廷為名臣獲膺褒寵之榮使人頌其賢德不衰是皆可
銘也銘曰

李氏之先世居豐潤徙來臨清隱處弗振爰及於公德
善始彰以身為訓儀型一鄉生遺榮祿沒膺顯命有子
有孫以延厥慶追銘其藏溫良之原百世之下其尚有
聞

張處士尚脩墓誌銘

同邑義士張巨川以謝恩至京師奉鄉先生楊遜遊所
為其尊府行實來請予曰先人葬已二十有五年矣而
墓石未有文先生與先人交幸惠然賜之銘追納之墓

中不惟先靈有慰聞者亦將曰先生之不忘故舊如此
先生之厚於不肖父子如此先生之待人不以死生為輕重
如此辭不獲遂叙而銘之曰張氏本曲江文獻公之裔有曰
昭宣者仕宋禾川某官子孫因留家禾川至曰師亮者徙
居禾川之銅谿五世祖文質自銅谿徙安成之城中共七世祖廷
貴大理評事高祖遵憲重慶監判監判之子桂芳處士曾祖
也桂芳之子弘道處士祖也自城中徙居邑之西大舍
弘道之子又新處士父也自又新以上連世不仕處士

幼失怙獨與母居叔弘道翁撫育而教誨之未幾弘道亦卒母孺人連遭大喪竭力襄事四壁蕭然撫處士哭曰汝先世素積善今不幸陵替至此嗣德延慶實在於汝汝其念之處士雖在幼稚而知其言之悲潛然淚下以泣由是發奮從師讀書脩身慎行比長有進取之志既而曰吾孑然孤立出處之際其誰與我遂絕意仕進儉以處已而勤以立其家家既饒裕而無驕矜之態以故鄉黨皆重敬之嘗痛不逮其父祖養時節祀事哀感

不自勝事其母孝敬備至母卒喪葬一於禮撫育弟妹
恩愛尤篤賓接士大夫惟恐弗及家門內外餘千指雍
睦無間方處士初自大舍徙居里楊梅谿之東念師亮
公在銅谿時有樓曰臨溪於是構樓數楹於梅谿之上
揭以舊名示不忘其先也處士性恬淡好施與饑歲粟
翔貴不徼利開倉以貸貧民有不能償者不責其償歲
早佃田有登有不登一蠲其租入為賦稅長其副已徵
民賦沒入官揭已資代輸不再徵於民假貸歲久卷籍

積多一旦盡取焚之其行義類此處士名齊字尚脩死
時年五十有八娶李氏子男三人長若金次即巨川次
作霖女一人曾若懋其婿也孫男十餘人永樂庚子三
月十有二日其卒之月日也是歲十二月某日其葬之
月日也而納墓石則正統九年某月某日也墓在里洪
陂山之原銘曰

既艱於幼復嗇其壽何畀之才而不之佑惟性之淳惟
德之懋於何徵之仁者有後洪陂之源水深土厚有以

藏之終古不朽

楊處士道存墓誌銘

予少游泮庠與戴君誠問交誠問貢國監而其妻之弟楊季安來為弟子員從予遊予舉進士去鄉里既而以內艱歸季安之尊府處士君邀予至其家塾令季安卒業於予是歲丁亥也己丑服闋與處士別入京師承命赴行在明年冬還南京鄉人來者問安處士曰死矣予哭之寓館距今二十五年矣季安自國子赴選天官得

知景陵縣持翰林編修彭玘所述處士行實來請銘予
念與處士翁婚父子交久且厚銘不可辭乃叙而銘之
處士諱誠字道存本姓郭氏其先居袁之宜春親仁里
有學訥者業儒元初為安福泮庠直學娶邑雅源袁氏
遂居安福處士曾祖也直學生竒伯處士大父也竒伯
幼孤鞠於袁氏竒伯生觀泰處士父也元季兵亂處士
三歲失怙九歲隨母改適楊氏遂冒姓楊處士生而質
直不務浮靡志欲有為而力不足嘗歎曰世如此家又

如此學則無暇仕則非時何以振先業乎惟修方寸地
求無忝而已楊氏無子擇同姓子立以為後處士與之處
若親昆弟然洪武初覈丁產富豪者多為詭計處士曰
賦稅徭役民之職也富盛者圖苟免則貧乏者當之明
有國法幽有鬼神焉可誣也衆聞之皆自悔不敢作非
為歲壬申洪水泛溢人有溺死者水退率家衆荷鍤沿
江見浮屍輒收瘞因捐資造舟以濟渡由是方春江漲
隆冬甚寒人無病涉焉甲戌詔下郡邑修陂池為旱澇

備縣符處士董其役時嚴冬興作饑窮疾疫者衆捐薪米以給之施藥餌以療之皆感激爭先赴役功獨易以就鄉人有貸息錢商於閩者三人冒瘴癘死其家懼息益重償所貸處士曰死者骨未歸而償吾債吾豈忍今付爾券以所償歸其骨庶快吾心隣邑有貧無賴者誘鄉童誣為己子來售處士知之隨所議直與之既去詢童得其父名召之領以歸且戒勿與讎平居訓迪子姓必以道德仁義為先非禮之言不出諸口終身與人未

有爭競嘗於所居之偏築一軒前植花竹幽夤可愛客
至從容賞酌平生不喜飲然待客必醉而後已暇則陶
然山溪猷畝之間世事略不經慮永樂庚寅八月忽邁
疾草假貸契券悉焚之謂諸子曰吾以身報楊氏恩汝
兄弟無忘所自必復姓遂卒是月二十九日也初娶劉
氏繼周氏子男三人長曰懷素次懷炯次懷忠即季安
女二人長適劉氏次適五軍斷事稽禮戴誠問孫男十
三人女十人其葬以庚子正月一日其墓在佛嶺東坑

金史口房人言
卷十
之原銘曰

生遭世艱復失怙長際時平離鄉土俛以報恩義弗去
沈浮里閭甘守素我心獨知匪人喻有子有孫家亦裕
老遺塵俗不闕慮忽厭濁世倏然去白雲滿山風滿樹
邑人作銘埋之墓萬百千歲留清譽

錢處士秉源墓誌銘

宣德九年十二月八日文江錢處士沒沒之後四年其
從子翰林侍讀學士習禮撰次其行實請銘於予辭不

獲遂叙而銘之曰處士諱穆字秉源曾大父明則大父以和父立吾皆有善行稱於鄉里處士生魁偉有膽略元季盜起輔族之長者募鄉兵為保障計以隣援懷貳度不能舉奉二親出避寇雖擾攘艱苦中而志氣不衰甘旨必具及國朝平定天下盡室來歸經理舊業以為仰事俯育之謀外以應公上之需內以給私家之費井井有緒父卒居喪盡禮事其母尤孝謹篤意訓諸子及成立一以家事付之與宗親父老觴詠往還論說古今

人事賢否得失如指諸掌疊疊忘倦既老行不以杖耳目聰明食生飲寒如少者年九十有六以疾沒配曾氏有賢行先卒子男三人孟芳仲穎季恂女一人孫男幾人某年某月日葬某山某原處士志氣高邁勇力絕人初保障鄉里時與敵死士親冒矢石力與賊鬪手殺數人賊退走洪武末山谷惡暴子相聚為盜欲焚劫諸大姓處士方會上客有來言者輒罷酒適幼子卒於外忍哀呼子姓僮僕倡率里人分守險阻盜悉衆來攻殲其

首惡者二人盜遂斂去境內安堵其壯勇如此嘗被誣
役作京師處患難中怡然自得無戚戚之容每讀史傳
至良將烈士慨然太息而想慕其遺風或與客飲飲酣
氣振輒歌信國文公題雙廟詞感激悲憤至於泣下此
其志何如哉使遭其時得其志擐旗斬將之勲烈可以
指取乃自壯至於老而終不偶沉浮閭里間以死得不
可哀也耶銘曰

負雄豪抱竒器遭時艱翦兇類際昇平樂居第喜劍歌

惜無位稔將百齡溘仙逝我盟其幽表居志巖然其光
不可閱

尹處士仲剛墓誌銘

處士諱直字仲剛姓尹氏吉之安福人祖弘中父一德
俱隱處弗耀遡其先世始居邑西之梅磬曰德勝好游
山澤至城北二舍許地名集鳳樂其山水明秀里俗恬
厚因徙居之子慶好施予卹貧難行惠愛於鄉其後族
遂以大處士承祖父之餘生而穎異少嗜學喜文尤工

詩持身慎檢馭下寬簡於人無責備而交朋友務敬以
信動必蹈循矩矱蹈蹈罔違禮平居訓子弟為善指切
興廢以為勸戒縷縷幾百言皆可書或勸之仕則曰今
天下理平明良相逢躬耕為善人可也嘗以編役當輸
賦至京次子請代之行處士慨然曰昔黃叔度四十入
洛吾年僅過之可不一至京師乎即具舟下彭蠡泛大
江以及畿甸間游觀景勝未幾風疾復作即促裝南還
日與故人叙論契好或劇飲大醉談謔以相歡洽或咨

其家事輒笑而不答惟語諸子以善承家膺門為務今年夏疾篤親黨皆來環泣處士徐曰死生常理過自悲悒非達也神色不變端坐而逝時永樂戊子七月五日也享年四十五妻胡氏子男二人長行遜由泮生決科今任黃州郡學教授次行滾女二人蕭元仁郭泰雍其婿也孫男四人處士遺命衬先兆其孤將他葬一夕夢其家人曰吾當葬某山已而求之果吉遂以是歲臘月廿三葬馬銘曰

彼狂而獬兮胡壽之遐此恭而弗永兮豈宰物者之忒
差亦邂逅之偶然兮吾又奚嗟將厚蓄而不食其報兮
天固以是畀其嗣人者耶

池從華墓誌銘

天官員外郎李君茂弘謂予曰吾有友學既成未沾一
命以歿者於今二十餘年矣吾甚憐之前年吾蒙恩得
告一暫還鄉里其嗣子謙踵門且泣曰先人葬未有銘
知先人之德善之詳者莫如先生其為我撰次以求銘

於當世士大夫追納之墓中不勝其大幸吾時已諾之
今願竊有請以嗣其意以慰先友之靈於地下而吾於
交際之誼亦庶幾其少盡也幸無辭辭不獲則叙而銘
之曰君諱奉宗字從華姓池氏黃巖士族少儻有大
志而蚤喪父母鄭鞠育而教誨之勤以理家暇則讀書
學為文詞不輟既長置別業於其居之東蒔花藝竹靚
深幽雅客至相與觴詠其中若無意於斯世者既而翻
然曰古之人澤利生民名垂竹帛者皆由學以致之吾

豈徒為太平民而已哉於是奮身而起入縣庠補弟子
員委已於學學日益進行日益修名日益著鄉族老長
皆期望之一日遽得疾卒於家聞者莫不痛傷焉傷其
志未遂而止於此也君性至孝事其母極甘旨之養痛
父早世忌日必哀處兄弟極友愛季兄蚤亡二姪孤弱
撫育之如所生親故有死不能葬者出已資助之假貸
不能償者因以與之朋友有以急告者赴之惟恐不及
以故鄉人愛之者多惡之者益鮮而歿之日哀之者尤

衆也曾大父誠大父邦佐父思彬皆隱居樂善娶同里
黃氏有淑德子男二人長曰謙今為邑庠生次日杲女
一人適解孟溫孫二人裕生女二人永樂己未四月四
日其歿之年月日也明年丙申十一月九日其葬之年
月日也靖化鄉古竹東山之原其葬之處也銘曰
惟其材矣何不棟梁惟其良矣何不高驥奄其逝矣誰
不汝傷惟德惟善誰其汝忘於以張之其存者長

國子學正林先生墓誌銘

正統十一年丙寅冬十月二十有五日本國子學正林先生歿先生未歿之先遣其子還候官為其子議姻別數日而得疾未一月而歿歿時惟嗣子謙在側疾革其友學錄劉叔翱至執其手曰吾兒子幼未練於事吾幸於子友厚善吾疾必不起矣身後事以屬吾子言盡而益悲明日遂歿叔翱既為治棺衾殯斂訖述其世系行誼來請予銘曰此先生治命也嗚呼吾方倚先生道德行義以之淑諸生俾有所矜式而忽焉以死中心不勝其

痛悼尚忍銘其墓耶雖然先生之命在予銘不可不有
副之乃叙而銘之曰林氏本光州固始人其先有曰慶
源者五代時仕為某官從王審知入閩居候官曾祖洞
觀祖寶考叔容皆不仕先生諱居字禮節永樂癸卯以
書經領鄉薦明年會試禮部中乙榜授附州學正改蘄
州以內艱去服闋陞國子學正遭父喪家居起復還職
未一年以疾卒享年五十有一配立氏子男二人長謙
次謹女一人先生為人篤厚簡靜敦行孝弟在官皆迎

二親就養備極子道親沒奔喪葬祭禮儀周至識者敬
羨與人交必以誠信言語論議行止動作必循規蹈矩
不正之言非禮之事未嘗出諸口見諸行其職教內外
所以訓迪諸生由體及用循循有序故其化導於人率
有成效雖武夫悍卒皆生敬仰其在太學畿內之士以
舉進士為業者踵門無虛日先生皆受而教之無少怠
及其沒也士子之哀之者尤慟也叔翱為予言翱嘗與
先生講易至大壯之六五喪羊于易無悔謂翱曰君子

以柔制剛則剛無所用而其強暴之氣自屈矣翺服膺
之其後遇人以非禮相加輒與辨論窮極而後已既退
自悔悟因念先生未始與人較是非長短然後知先生涵
養深至未易及也至於誠意正心之學修己治人之方
工夫切實論議皆有本源使其得進於用而充其所量
將必特然有可觀者而止於斯其可哀也夫予以叔翺
知人且知言遂以是銘墓在金鷄山先塋之次葬以某
年月日也

黃助教母杜氏墓誌銘

國子助教豐城黃先生俊將改葬其母孺人之墓奉內
兄冠帶致仕官杜奉所為狀來請銘曰俊賴母之教獲
領鄉薦受國恩典教湖廣之穀城迎母就養沒於穀城
權厝於里黃家汶卜人云不吉俊將求吉地遷焉願先
生賜之銘埋於塋以慰先靈幸毋辭黃先生篤厚士觀
先生之為人則其母之賢可知也遂不辭而銘之曰孺
人姓杜氏諱妙真南昌豐城折桂鄉人杜本詩禮之族

五世祖某通經學有名累舉不第懷憤以卒曾祖某父元實皆不仕母聶氏孺人性聰慧自幼勤於女事不待教而能既長父母為擇配歸黃氏為伯泰婦孺人既歸黃氏事其姑甚謹相其夫有禮率其女婦躬紡績之事益勤不懈宗族娣姒之間恩意相接其所以助祭祀待賓客皆有條理必盡其心由是家益以裕伯泰無內顧之憂伯泰凡再娶初娶聶氏生男二人曰熙賢熙善孺人其繼室也生男一人即俊女二人孺人所以教誨養

育衣服飲食之事彼此均一外人不知異焉女長適吳永清次適左實孫男二人曰茂曰中孫女二人宣德癸丑夏六月朔日孺人沒之年月日也墓在家鄉某里某山之原其葬則某年某月某日也銘曰

女德之懿婦道之純為理既勤家室既殷一日不見誰不酸辛惟山峩峩惟水沄沄既固既安以利後人

亡友周志超墓誌銘

志超予友也亡已二十年矣其弟志謨為太學生得還

其鄉始以修撰劉君顯仁所述志超事行來請銘志超
姓周氏名卓志超其字也曾祖茂敬祖芳平父如安皆
隱德弗耀志超自幼穎敏其為人沉靜簡亮年十五入
縣庠為弟子員專力於學其讀書日夕有程度嘗曰士
之為學非徒以資利祿將以行之也故其所言與其行
事必由規矩凡經史諸子百家之書竭資以購求之而
大肆力於其間書日以益積學日以益博同輩皆敬讓
之謂其一出必有遇焉既而嬰疾退居於家君性孝友

事其二親甘旨必具疾劇猶手不釋卷如安止曰汝可
養疾不宜復事詩書君但泣不能對壬午鄉閭盜起如
安遇盜被害君力疾訴官取盜正其罪為文祭於父棺
前哀感行路母賀氏溝疾危殆醫弗能治或言永新曠
處良工於醫然非厚賞不能致君聞候至事之如所親
處良感其意醫為盡力母疾愈酬以金幣處良辭謝而
去君於為義若嗜欲不計利害同門友朱勉行遇悍卒
醉怒逼赴河死其家訴官卒黨把持之君憤然排羣黨

以理白於官然後得行竟為所訴連至京卒復其仇朋
友有避難人所拒而弗納者投之款接如平時君且死呼
志謨謂曰汝勉之顯親揚名在汝也吾疾不起矣其以
汝子虬後我遂卒永樂丙申十二月十二日也享年四
十有三某年某月某日葬里毛竹園祖塋之次配賀氏
所生子震巽早夭嗣子一人即虬也女一人劉彥周其
婿也志超有志於學有志於功名之事而俱不遂以死
世故悲其不幸也志超與子同年生月日長於予予呼

之為兄平生喜獎進人以就於學而於予尤有意焉予
嘗與君夏夜讀書東齋每至二更罷其夜過三更始就
枕大雨至不知也早起水漂鞋方覺明年君疾作不能
就學而予學亦怠使君不以疾廢則麗澤之益深予庶
幾有可以及人者嗚呼君之不幸亦予之不幸也由今
思之其有負於君多矣尚敢銘其墓耶然以志謨之請
不可辭遂序而銘之銘曰

志欲有為而不及施忽然以死其又可悲竹園堂封宿

草萋萋餘二十年我為銘詩式昭於德庶永厥垂

指揮同知陳達父墓誌銘

忠義左衛指揮同知陳達將葬其父母來求予銘曰先世本應天之六合人先大父從太祖高皇帝平定天下東征西伐有勞績自小校累遷袁州衛指揮同知洪武中以誑誤落職沒於京師先父坐累謫戍大寧在大寧甘貧苦數年從太宗文皇帝平內難每戰皆有功自行伍中累功授忠義左衛指揮同知守遵化以守城功進階

懷遠將軍得世襲還京師沒於永樂十九年二月五日
享年幾老母張氏袁之宜春人父岳州衛指揮既歸陳
氏未幾而先祖沒先父有大寧之行雖在艱險之中奉
先祖母盧淑人極孝謹當大寧兵興擾攘之際闔室奔
走遇寇急有六歲子盧淑人曰我老宜棄抱汝子疾走
老母與先人曰事迫矣勢不能兩全母不可棄棄其子
昇盧淑人晝夜兼行竟獲免先人沒後二十六年今年
二月二十七日以疾沒壽七十三子男二人長即大寧

所棄者次即遠女三人孫男一人先人葬宛平京西鄉
之原今將啓先人二墓奉老母之喪合窆焉先生與先
人交厚而老母又先生之鄉人也幸賜之銘以安先靈
先生其無辭子曰遠八歲喪其父能自立於讀書習武
藝以不墜先緒其立心制行忠厚端潔言語行事皆有
條理今又能求銘以葬厥父母厥父母可謂不死矣是
宜銘遂為之銘袁州君諱晟忠義府君諱啓芳張淑人
尊府諱廷秀今年正統十一年丙寅也某月某日其葬

月日也

李處士志節墓誌銘

安成之李有兩派一祖西平忠武王曰西平李氏一祖南唐曰金陵李氏志節本金陵之裔由其祖用敬上繼上田庭蘭翁遂為西平裔矣用敬生重珍勁軒父也勁軒諱操字志節生甫三歲而母周氏沒父重珍亦連遭家難謫後河南勁軒遂鞠於外氏涉歷艱苦故於鄙賤之事莫不通曉既長歸故鄉而先世貲產蕩覆幾盡勁

軒克自樹立於艱難之中竟復舊業拓田園築居第有加於昔勁軒聰慧過人就學兩期月於書多涉獵有讀十餘年或不能過也性孝友嘗恨其母不逮養父沒河南之後跋履險阻徑往負喪歸葬每言及流涕事繼母尤極愛敬與母兄汝庸居友愛尤篤及析田產奴婢多讓之宗族子弟有窘窮者周給之俊異而能向學者力獎諭而資之修理先祖父母墳塋其費一不以干於眾最喜吳文正先世義塾記中孝弟忠恕之說常舉以為家

訓甲寅乙卯連歲旱蝗民饑朝廷開義倉賑給而隣近
之民未之及者勁軒遂發私廩假貸鄉人不責其息顛
連無告者以白粲遺之一日行龍雲嶺道中遇一荷擔
者飢餓垂絕即袖出白金託近山樵者負歸食之得不
死或遇荒月大集饑窘作粥飯以餉之鄉鄰有寒者衣
之飢者食之貧而病者惠之藥死不能葬者給以棺每
斯文賓客至傾倒欵留必極歡宴雖累日無怠倦意襟
懷磊落議論慷慨使人樂聽之不厭晚年以故居弗稱

意乃改卜於下方制極精緻又築一室於新居之偏曰
勁軒為休老之計鳩工甫畢而疾作矣疾草肩輿還正
寢具衣冠服謁先祠退奄然而逝正統十三年六月十
日也享年六十有四娶龍雲劉氏子男五人長文次章次
育今為縣庠生皆劉出也次京亨側室朱出也孫男子
一人談諤訥詒詠試誨讓謨記闕孫女二人曾孫男一人標
以是年冬十二月廿六日葬於本里麻園嶺之原育自
為狀與其兄來請銘銘曰

勁軒本是金陵裔由祖出為上田繼自此遂續西平李
兩族簪纓習詩禮至於勁軒尤聰慧於書過目輒能記
學值艱孤半途廢克自樹立起顛沛山林園田繞居第
有光於前無不遂襟懷磊落負奇氣生於昇平沒盛世
有賢子孫繼厥志頻仰兩間可無愧麻岡之原佳山水
誰其卜之青烏子式安冥靈福後嗣



古庶文集卷十